



Selasa, 02 Agustus 2022
Ogen: Esekiel 45:9-17



"Sukat-sukat si Bujur"



“Sukat-sukat si bujur”, e me tema renungenta wari enda. Si ngerana man banta gelah tetap nggeluh alu bujur ras payo. Kai kin untungna nggeluh bujur alu make sukat-sukat si benar? Tentu dampakna entah pe untungna la hanya man kalak sindalankenca tapi pe man kalak singalokenca. Keuntungan si idat adi make sukat-sukat si bujur e me: pusuh perukuren dame, enterem kalak si rate ngena erkiteken payo pertimbangan. I bas pendahin erbinaga pe, adi i pake sukat-sukat si bujur tentu melala langganen dingem hubungenna ras su nukur pe tetap mehuli.

I bas Pustaka Si Badia melala isingetken kerna nggeluh bagi si ngena ate Tuhan, bage pe kerna make sukat-sukat alu payo dingem bujur; selain i bas kitab Ezeiel 45:9-17, i bas kitab Imamat 19:35-37 bage pe Kitab Ulangen 25:13-14 i tuliskan “*Ola tipu kalak alu mpergunakan sibar-sibar, timbangan ntaah sukat-sukat si la payo. Pakelah sibar-sibar, ntaah timbangan, ntaah sukat-sukat si bujur. Aku kap Tuhan Dibatandu, si enggo maba kam i taneh Mesir nari. Patuhilah kerina undang-undang ras perentah-perentahKu*”

Kerna kai si isingetken dingem ituliskan enda, tentuna guna mpersingeti kita gelah tetap ngelakoken kai si benar dingem bujur i tengah-tengah kegeluhen.

Adi kita nggeluh bujur dingem benar tentuna si ialoken me si mehuli i bas geluhta, tapi kalak si sura-surana jahat dingem perdalinna pe kempak si la payo, idatna ka nge upahna e me kiniseran. Padan Dibata tetap nai nari seh asa gundari, Ia Dibata si setia dingem adil; e maka tetaplah kita nggeluh alu payo dingem bujur. Ndalanken si bujur ras benar i pasu-pasu Tuhan kap geluhna, makeken sukat-sukat dingem timbangan si bujur keriahen kap sikerajangenna. Tapi cilaka dingem isirangi teman-teman kita adi nalanken sukat-sukat si la payo. Gundari ibereken kita milih siapai si man dalanenken. Pindo hikmat man Tuhan guna milih si ngena ateNa.